



Inzko: Daytonski mirovni sporazum bio je temelj ponovne izgradnje zemlje

Tokom posjete Sjedinjenim Američkim Državama, visoki predstavnik Valentin Inzko učestvovao je na okruglom stolu posvećenom budućim perspektivama Bosne i Hercegovine, u organizaciji Fakulteta za upravu John F. Kennedy na Univerzitetu Harvard.

U svom obraćanju, visoki predstavnik je dao kratak pregled svega što je postignuto od potpisivanja Daytonskog mirovnog sporazuma, koji je bio temelj za ponovnu izgradnju BiH.

"U prvom desetljeću bili smo svjedoci napretka koji je postignut na izgradnji mira i reintegraciji zemlje, dok je u drugom došlo do usporavanja reformi i cijelog niza pokušaja da se ponište mnoga od tih važnih postignuća," rekao je visoki predstavnik.

Naglasio je da je, bez obzira na tešku političku atmosferu, u zemlji bilo pozitivnih pomaka u vezi sa njenim težnjama da se priključi EU. "Proces integracije sa Evropskom unijom ostaje glavna tačka oko koje se svi politički faktori u zemlji slažu i upravo to je najbolja prilika da se postignu održiva stabilnost i prosperitet."